



# ज्वजलपा वाऱ्वा

JWOJALAPA WEEKLY

दैं द ल्या: ०५ (पूर्णडिक १५२) ने. सं. ११३७ गुंलागा षष्ठी आइतवा: २०७४ श्रावण २९, गते आइतवार (Aug- 13, 2017)

मू द १- पृष्ठ १२

## किपू नगरपालिकाया जनप्रतिधित गुलि धनी ?

किपू नगरपालिकाया आधिकारीक वेभसाइट

[www.kirtipurmun.gov.np](http://www.kirtipurmun.gov.np)

पाखें सार्वजनिक, वडा नं. ५ व ६ या वडा अध्यक्षपिनिगु सम्पत्ति विवरण धा:सा मव:नि



ज्वजलपा वा:पौ/

किपू नगरपालिकाया मेयर रमेश महर्जनं नगरपालिकाया न्हापांगु बैठकं क्व:छ्यू कथं नगरपालिकाया जनप्रतिनिधिपिं सकसियागुं सम्पत्ति विवरण लच्छ्या दुने सार्वजनिक यायेगु ध्या:दीगु ख:। लच्छ्या दुने सम्पत्ति विवरण बिइ मफुत। थ्वहे इलय् स्थानीय विकास मन्त्रालयनं नं सम्पत्ति विवरण बिइत निर्देशन बिइवं नगरपालिकाया पदाधिकारीपिन्सं सम्पत्ति विवरण बिइगु यात। किपू नगरपालिकाया मेयर, उपमेयर व भिम्ह वडाध्यक्ष मध्ये वडा नं.५या वडाध्यक्ष राजेन्द्र महर्जन व वडा नम्बर ६ या अध्यक्ष न्हुच्छेवहादुर महर्जनया धा:सा सम्पत्ति विवरण व:गु मदुनि। किपू नगरपालिकाया आधिकारिक वेबसाइट [www.Kirtipurmun.gov.np](http://www.Kirtipurmun.gov.np) पाखें मेमेपिनिगु सम्पत्ति विवरण थुगु कथं दु।

नगरप्रमुख रमेश महर्जन –करीव १२ पी जग्गा, लुँ द तोला, वह: ३० तोला, शेयर कित्ता १६२० (भिंखुस: व नीगु) धेवा २, ३३,७१४तका बैक्यू वचत दु। थ्व सम्पत्तिया स्रोत पैतृक व अंशवण्डा

उपप्रमुख सरस्वती खडका– २ पी व ११ आना जग्गा, लुँ ३ तोला, वह: ४ तोला, ५२द्व: तका धेवा बैक वचत, २८ कित्ता शेयर

वडा नं.१ वडाध्यक्ष हर्ष महर्जन– ५८२ वर्गमिटर जग्गा लुँ ६ तोला, वह: १० तोला, १० लख तका: धेवा बैक्यू वचत, २९९ कित्ता शेयर, मोटर साइकल छग: व कार्गो भ्यान छग: , थुकिया स्रोत पैतृक

सम्पत्ति व थ:म्हं कमाय् यानागु धयात:गु दु, वडा नं.२ वडाध्यक्ष रमेश मान महर्जन – २३.५ रोपनी जग्गा, लुँ १४ तोला, वह: ३० तोला व १०० ग्रामया पत्थर, ३९ द्वा: धेवा बैक वचत, ३१ लख धेवा त्यासा पुलेमानिगु, ३ ग: मोटरसाइकल, वडा नं.३ या वडाध्यक्ष राजेन्द्र महर्जन– १० पी वुँ, लुँ ५ तोला, बैक्यू ३०,८३,०००/ दु, छग: मोटरसाइकल व छग: कार्गो भ्यान , वडा नं.४ अध्यक्ष राजेन्द्र बानियाँ – १० पी वुँ, लुँ २५ तोला, वह: ५० तोला, १२५० कित्ता शेयर, ५ लख तका बैक्यू वचत, पेट्रोल पम्प व्यवसाय, वडा नं.७ अध्यक्ष राजकुमार माली– १४ पी ७ आना वुँ, लुँ १.५ तोला, २ लख बैक्यू वचत, २०० कित्ता शेयर, वडा नं.८ अध्यक्ष विनोद महर्जन– वुँ २ पी व द आना, लुँ १० तोला, धेवा १२,३१,०००/ बैक वचत, शेयर २०० कित्ता, वडा नं.९ अध्यक्ष गंगाराम महर्जन– ७ आना २०० वर्ग मिटर जग्गा, लुँ १५ तोला, धेवा १५,२०,०००/तका बैक वचत, ८२ कित्ता शेयर, वडा नं.१० अध्यक्ष अमन महर्जन– २४२ वर्गमिटर जग्गा, लुँ १३ तोला, वह: २२ तोला, ४०,०००/ नगद, २,४०,८०६ /तका बैक ब्यालेन्स, १०८८ कित्ता शेयर, छग: मोटरसाइकल।

छित: नेवा: एफ.एम.या ज्याभ्व:



न्ह्याकामि दयेकेगु



## जिमिगु अभियान

वइगु गुंलागा द्वादशी शनिवा: भदौ ३ गतेनिसें सैद्धान्तिक नापं प्रयोगात्मक छवा:या तालिम याकनं स्वापू तयादिसँ ।



नेवा: एफ. एम. १०६.६

न्यामासिमा, द्य:धवाखा, किपू-२

फोन ४३३४२२२, ९८४१३०१४१९

(ज्ञानबहादुर महर्जन नेवा:)

ईमेल: [ankmedia.newafm@gmail.com](mailto:ankmedia.newafm@gmail.com)

## राराहिल मेमोरियल स्कूल

कीर्तिपूर, काठमाण्डौ

सूची दर्ता सम्बन्धी सूचना

यस स्कूलको लागि आ. व. २०७४/७५ मा आवश्यक पर्ने तपशिल बमोजिम वस्तु तथा सेवा खरिद कार्यको लागि सार्वजनिक खरीद नियमावलीको नियम १८ बमोजिम सूची दर्ता गर्नु पर्ने भएकोले सुचिकृत गर्न इच्छुक व्यक्ति तथा फर्महरुले नवीकरण सहितको इजाजत पत्र, स्थायी लेखा नम्बर, मूल्य अभिवृद्धिकर दर्ता प्रमाणपत्र तथा आ. व. २०७३/०७४ सम्मको कर चुक्ता प्रमाणपत्रका साथ यो सूचना प्रकाशित भएको मितिले १५ दिन भित्र यस स्कूलमा सुचिकृत गराउन हुन अनुरोध छ। साथै एउटा शीर्षक भन्दा बढी शीर्षकमा सूची दर्ता गर्नुपर्ने भएमा बेग्ला बेग्लै निवेदन पेश गर्नुपर्नेछ।

| सि.नं. | विवरण  |
|--------|--|
| १.     | स्टेशनरी मसलन्द तथा विविध  |
| २.     | छपाई   |
| ३.     | फर्निचर तथा फर्निसिड   |
| ४.     | टेलिफोन विद्युत, नेटवर्किङ तथा सफ्टवेयर निर्माण                    |
| ५.     | विज्ञापन सेवा  |
| ६.     | सरसफाई सम्बन्धी कार्य  |
| ७.     | सवारी साधन मर्मत   |
| ८.     | खानेपानी आपूर्ति   |
| ९.     | कम्प्यूटर प्रिन्टर लगायतका इलेक्ट्रोनिक सामानहरु आपूर्ति तथा मर्मत |
| १०.    | क्यान्टीनका लागी आवश्यक दाल, चामल, तरकारी, खाजा इत्यादी            |



# ज्वजलपा वा:पौ

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

रामभोला महर्जन, निरजमान सिंह  
थाक्

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

## सम्पादकिय

## संविधान संशोधन व प्रदेशा चुनाव

वङ्ग माघ ७ गते तकया दुने प्रदेश व प्रतिनिधिसभाया तकं चुनाव क्वचायेकेमा:गु संवैधानिक बाध्यता दु । स्वंगु चरणया स्थानीय तहया निर्वाचन यायेगु ल्यं वनिगु हे अवस्थाय् आ: प्रदेश व प्रतिनिधिसभाया चुनाव छन्दु हे यायेगु ला कि व्यागलं व्यागलं दिनय् यायेगु धका: संसदय् दुगु प्रमुख राजनीतिक दलया नेतातय्गु दथुइ बहस जुयाचवंगु दु ।

फुक्क तहया चुनाव यायेगु धङ्गु संविधानयात कार्यान्वयन यायेगु निति ख: । संविधानया सवालय् आदिवासी जनजाति, मधेसीनसे उत्पीडित समुदायपाखे असन्तुष्ट प्वका संविधान संशोधन यायेमा: ध्याचवंगु अवस्थाय् न्हापा संविधान संशोधन याना सकलसिनं स्वीकार यायेफङ्गु कथंया संविधानय् हिलेमा: धका: स: तयेगु नाप अभियान न्ह्याकेगु ज्या यानाचवंगु दु । आ: स्थानीय तहया स्वंगु चरणया निर्वाचन क्वचाये धुंका: थुगु विषय अफ् अप्ठ: बहस जुइ । अबले दबावमुलक ज्याभव: तकं राजनीतिक दलतय्सं म्हितीगु संभावना दु ।

प्रमुख राजनीतिक दलया नेतातय्सं संविधान संशोधन याना असन्तुष्ट पक्षया माग सम्बोधन यायेगु सवालय् निगू मत मदु तर ह्यु ह्यु बुँदा संशोधन यायेगु धङ्गु सवालय् धा:सा व्यागलं व्यागलं मत दु । थ्व अवस्थाय् दलया नेतातय्सं व्यापक सहलह व्याकेमा:गु अवस्था दु । उकिं थ्व इलय् संसदय् दुध्या:गु प्रमुख राजनीतिक दलतय्सं प्रदेश व प्रतिनिधिसभाया चुनावया तयारी नाप नाप असन्तुष्ट पक्षमा माग पुरा यायेगु कथं संविधान संशोधन गुगु कथं यायेगु धङ्गु बारे आवनिसे हे बहस न्ह्याकेमा: । मखुसा कन्हय् वना हाकनं अन्तिम इलय् वया जक कुत: यात धा:सा संविधान कार्यान्वयन व प्रदेशसभा नाप प्रतिनिधिसभाया चुनावय् तकं त:धंगु लिचव: लायेफु धका: नेतातय्सं इलय् हे बिचा: यायेमा: ।

## गजल शौरभ शाक्यया

### गजल-४१



सुइतं नुगलय् तया म्हगस म्हकां छुयाये धाकू वयेका भल्ल मत: च्याकां छुयाये । कुतू वनेवं तज्याइगु खा:या वस्तू ख: वइ तसकं य:येका मतिना यानां छुयाये । माया, दया, करुणा मदु थौंया मनूतय् उमिगु न्ह्यने मिखाय् ख्ववि जायेकां छुयाये । आ:सुं मनू हे जूगु दु, सुं य:हे जूगु दु नुग:या स्या:धा: सुइतं उलां छुयाये । थ्व गजा:गु स्या:चा ख: छं सिउला सौरभ वने धका:वं जिद्दियात छं पनां छुयाये ।

## सापारुया इतिहास-१



### -रोशन श्रेष्ठ

नेवा:त नख:चख: न्यायेके य:, तर नख:चख:या ल्यूने सुलाचवंगु खँय् ध्यान तये मय: । नयेगु, त्वनेगु रमभ्रम यायेगु (भित्तुना कालविल यायेगु -वस) थुलि जुइवं गात ।

सापारु नेवा:तय् त:जिगु नख: ख: । साया: छवयेगु चलन दु । सापारुया रमभ्रम दु । थी थी बाजं दु । प्याखँ पिथनेगु निसं यक्व यक्व ज्याभव: सापारुया लसताय् भी नेवा:तसं यानाचवनी । अले सापारुया इतिहास छु ख: धका: सुनां नं न्यन धा:सा बाखँ छपू न्यकिइ ।

“प्रतापमल्ल जुजुया पालय जुजुया य:म्ह लानीया काय मत्यवं मन्त । दुखं क:म्ह लानी छुं नं मनसं खयाजक च्वनेवं जुजुं 'थजा:गु दुख छन्त जक मखु, सर्कासितं जुइ । का स्व: दुखं क:पिं गुलिमछि दु' धका क्यनेत देसय् दक्व लोकजनपिन्त थ:पिनिगु छेंय् दच्छि दुने प्रान त्व:तूपिनि लुमन्तिइ साया: पित हयेत उजं बिल । लोकजनापिं सकलसिया दुख खनेवं लानिया चित्त थीर जुल । थ्व हे उजं लिपा दँय् दसं न्ह्याना वना साया: पित हयेगु चलन सापारु नख: कथं न्यायेकिगु जुया वल ।“ बाखँ क्वचाल ।

छें ज: या लुमन्ति ।

शिलापत्र इतिहासकारपिन्सं थी थी शिलापत्र, ताम्रपत्र, भोजपत्र, बंशावली ब्वना, इतिहासया प्रमाण मुंका दयेका:तगु इतिहासं नं थ्व बाखँया लिधंसा काइ । ब्वनेकुथिइ नं थ्व हे व्किइ । न्ह्यसलिस: कासा निसं जागिर नयेगु जाँचय् तक नं 'सापारु सुनां न्ह्याकुगु ख:?' धका न्यन धा:सा 'जुजु प्रताप मल्ल' धका: लिस: विइवं 'पायछि' जुइ । अर्थात, थ्व बाखँ न्यनाकथं, इतिहास ब्वनाकथं सापारुया इतिहास धयागु प्रताप मल्ल निसं जक न्ह्याइ । अर्थात 'सापारु नख:' धयागु प्रतापमल्लया आविष्कार ख: धयागु दावि भीत स्यनात:गु इतिहासं यानाचवंगु दु । तर जिगु विश्लेषण कथं थ्व सार्वजनिक मान्यता व इतिहास दक्व गलत ख: । प्रताप मल्ल सापारु नख:या आविष्कारक मखु । भीत कनात:गु बाखँ गलत जुयाच्वन, व्कात:गु इतिहास मिथ्या जुयाच्वन । थ्व हे इतिहास कुला स्वयेत जिं कुत: न्ह्याका: ।

सापारु नख: न्यायेकिइगु चलनत थाय् थासय् पा: । सापारु नख:या मान्यता थाय् थासय् पा: । सापारुया इलय् छ्यलीगु विम्व त थाय् थासय् पा: । अथे जुया थ्व नख: प्रताप मल्लया पालयनिसं जक न्ह्याकुगु नख: ख हे मखु । यदि ख:सा थ्व नख: दक्व नेवा: बस्तिइ न्यनी मखु, प्रताप

मल्लं राज यानात:गु देसय् जक न्यनी । प्रताप मल्ल शासन धयागु उली पुलाँगु काल मखु । यल, खप, किपू थिमि थें येँदेय् या सत्तिक च्वंगु थासय् जक सापारु नख: मदु, बल्कि फमिप, न्वाक्व, तिस्तुड, भिमफेदि, द्वाल्खा लगायत प्रताप मल्लया येँ देसं तापाक्क तापाक्क च्वंगु नेवा:देसय् नं सापारु नख: भ्र: भ्र: धायेक न्यायेकिइ । जुम्ला, बन्दिपुर, चौतारा, चैनपुर, सिन्धुली, धनकुता, इलाम आदि थासय् च्वीपिं नेवा:तसं नं सापारु नख: न्यायेकु । न्हूगु नख: व पुलाँगु नख:या भेद छुनेय यायेगु सामान्य चेतनाया मिखा जक उला स्व:सा नं सापारु नख: प्रताप मल्ल सिबे यक्व न्ह्य:निसं दु धका: सिइके फु ।

मल्ल थकुजुजु पिं छम्हसिनं छता यात कि मेम्हसिनं मेता हे ज्या याना क्यनेमा:पिं ख: । मन्थन याये (प्रतापमल्लं पारु कुन्हु साया: न्यायेकल धा:सा मेम्ह जुजुं दुतिया कुन्हु साया: न्यायेके नं फु । अथे यानाथकुगु जूसा सादुतिया, सातुतिया नख: नं दयेमा:गु ख: । तर मदु । छाय् पारुयात सकल नेवा:पिन्सं नख: कथं न्यायेकल जुइ ? थ्व नख: सानाप स्वाना न्यायेकेगु पलिसा नेवा:तय् ला नयेत सिक्क य:गु मेय् नाप स्वाना न्यायेकुगु जूसा सापारु मजुसं मेयपारु जुल जुइ । तर मजू । छाय् सापारु धका: हे न्यायेकल जुइ ? थजा:गु न्ह्यस:या मन्थन यायेवल्य् भीत लुधकं लिस: मव: ।

सभ्यताया इतिहास स्वत धा:सा भीसं स्यू कि जंगलियूग लिपा पशुपालनया यूग शुरु जुल । कृषि यूग शुरु जुल । स्वनिगलय् न्हापांगु सभ्यता मेय् लहिना जिविका याइपिं मेयपूया विकास पाखें न्ह्यानाव:गु ख: । मेयपू पिं बुलुहुं कमजोर जुयाव:लिसे सा लहिपिं सापूत बल्लाना वल । मेयपू व सापू पिनि दथुइ संग्राम जुल । थ्व संग्रामय् सापूत त्यात मेयपूत बुत । नेवा: समाजय् मेययात दैत्य भा:पा: देगलय् बलि विइगुनिसं मेयया ला नयेगु चलन या ल्यूने मेयपूत पराजित जूगुया अवशेष त्यं दइचवंगु ख: । भारतया थी थी थासय् त्यं दर्नापिं मेयपू (थुमित असुर धका: धाइ) दु । इमिगु संस्कृति स्वत धा:सा इमिस मेययात दैत्य भा:पा: बलि विइगु मया ।

सा लहिना जिविका याइपिं सापूपिन्सं सा या महत्व थुइका सा लहिगु प्रविधि परिष्कृत याना थपिन्त मेपिं सिबे समृद्ध व शक्तिशाली दयेके फुगु जुया हे मेयपुयात त्याके फत । समृद्ध व शक्तिशाली जुया जायावइगु (उन्नति जुयावइगु) पुचलं थ:गु सम्पन्नता व शक्तिया प्रदर्शनय् थ:गु चिं छ्यली । तरवारया बलं शक्ति आर्जन याइपिन्सं तरवार बझ बन्दुकया बलं शक्ति आर्जन याइपिन्सं बन्दुक ब्वइ । थौं कन्हय छेप्यास्त्र व सैनिक द्यांकया जमाना जुल, अथे जुया राज्यदिवस मानेयायेगु इलय् थ:गु छेप्यास्त्र व सैनिक द्यांक ब्वया, सैनिक परेड क्यना, यात्रा न्यायेकेगु चलन हलि न्यंक थौं तक नं दु ।

सापारुया शुरुवात व हे सापूमि नेवा:पिन्सं यानाथकुगु खयेमा: धयागु जिगु

दावि दु । सभ्यताया विकास जुजुं व:लिसं मनूतसं थपिन्सं यानागु विकास व उपलब्धि ब्वयेमा: धका: चेतना दयावल । सा लहिना समृद्धि व शक्ति आर्जन याइपिन्सं सा हे ब्वइ । गथे कृषि मेला जुइवल्य् फसि सयेकिइम्हेसिनं फसि ब्वयेहइ, लौका सयेकिइम्हेसिनं लौका ब्वयेहइ, अथे हे सा लहिम्हेसिनं सा ब्वये हइ । सकल राज्य सापूमितय्गु कब्जाय् जुइवल्य् सकलसिनं थ:थ: लहिनातयापिं सा ब्वये हयेगु जात्रा न्यायेकिइ । अथे जूसा सापारु वास्तवय् छगूकथं या प्राचीन कृषि मेलाया स्वरुप नं खयेफु ।

सापूमिपिन्त सा ब्वयेगु छगूकथं शक्ति प्रदर्शन नं खयेफु । मेयपूपिन्सं शायद शक्तिप्रदर्शन याये मस: जुइ । शक्ति प्रदर्शन मयाइपिन्सं शक्ति आर्जन नं याये फै मखु । स्प्यारिड मयाइम्ह बक्सर न्ह्याक्व हे बाँलाक म्हितुसा नं खेल त्याके फै मखु । व हे कारनं इतिहासय् मेयपूया पतन तसकं बाँमलाक जूगु जुइमा: । अथे जुया हे भीथाय् मेयपारु न्यायेकेगु चलन मदु । मेयपू पिनि अस्तित्व नं माले थाक् । मेयपूया खँ इतिहासय् जक लिक्नुनेधुंकल ।

सा लहिना जिविका याइपिं सापू या अस्तित्व थौं कन्हय् ज्यापु समाजय् आ:तक नं ल्यं दु । सापू पिनि बिस्कं बस्ति नं स्वनिग: ज:ख: दु । ईपिं नं नेवा: हे ख: धयागु खँय् विवाद मदु । सापूया राजनैतिक पतन लिपा किराँतकाल, लिच्छविकाल, मल्लकाल, शाहकाल, जुजुं खसिवर्मूकाल तक राजनीतिक ह्यूपा: वयेधुंकल । तर अथे जूसा नं सापूमिया छुं छुं अवशेष भीगु समाजय् ल्यनाचवंगु हे दर्नि ।

सापूमि या छें दुने सा आ:तक नं महत्वपूर्ण वस्तु ख: । सापू पिन्सं थ:थ:पिनि छेंय् च्वीपिं सा थुलि त:धि जुल थुलि हृष्टपुष्ट जुल धका लोकयात क्यनेगु ई साया: हे ख: । 'सा'यात विम्व दयेका यात्रा न्ह्याकेगु चलन 'सापारु' या चलन प्रताप मल्लं न्ह्याकुगु मखु । अजागु चलन प्रतापमल्ल सिबे यक्व यक्व न्ह्य: निसं अस्तित्व दइचवंगु यात्रा ख: धयागु प्रमाण त सापारुया थी थी चलन दुने सुलाचवंगु दु । व प्रमाण मालेत थी थी वस्तिया थी थी ताजिया साया: यात दुवाला विश्लेषण याना स्वयेमा: ।

साया: या थी थी चलन मध्य छगू चलन स्वयादिसं । सापू पिनि थ:गु छेंय् लहिनात:म्ह सा यात सापारु कुन्हु चा:हिइकेमा: धयागु चलन दु । थ्व चलन अज नं छथाय् निथाय् ल्यं दर्नी । न्हापा न्हापा सा लहिगु पेशा त्व:ते धुंकीपिं सापू पिन्सं मेपिनि सा न्ययाकया जूसा नं साया: चा:हिइकेगु यायेमा धाइ । तर लिपा सा लहिपिं म्हो जुजुं वनेवं यक्वसिनं थथे अनिवार्य सा चा:हिइकेगु चलन त्व:ता: छवत । सा लहिपिन्सं जक सापारु कुन्हु सा चासहिइके मा: धयागु चलन जक ल्यनाच्वन । थ्व चलन कथं सा चा:हिइकिइपिनि छेंज: सिइगु जुइमा: वा छुं विशेष घटना जुइमा: धयागु बाध्यता मदु ।

कथं .....





**HOOR**  
MOTORS  
PVT.LTD.



# आवर मोटर्सको GRAND EXCHANGE अफर

‘...ल्याउनुहोस् तपाईंको पुराना बाइक

हामी दिनेछौं उचित मूल्य

लग्नुहोस् नयाँ TVS का बाइक’

हरेक बाइकको खरिदमा

‘Sure Shot Gift’



स्थान : बालाजु चोक NIC Bank सगै

मिति : २०७४ भाद्र ४ गते देखि ९ गतेसम्म

स्थान : ट्याङ्गलाफाँट जाने बाटो मंगल स्कूल पछाडी

मिति : २०७४ साउन २५ देखि भाद्र २ गतेसम्म

## Hour Motors Pvt. Ltd.

Balaju Chowk Phone: 01-4360401 , 9851210478

Kirtipur-10 Phone : 01-4333605 , 9851139402

## सामुदायिक विकास समाजया निक्व:गु दँ मुंज्या



### ज्वजलपा वा:पौ

विशेष यानां भुखाचं पिडितपिन्त ग्वाहालि यायेगु तातुनां २०७२ सालया भुखय् लिपा पाँगाय् पलिस्था जूगु सामुदायिक विकास समाज, नेपाल संस्थाया निक्व:गु दँ मुज्या म्हिग: साउन २८ गते शनिवा: जनसेवा मा.वि.या हल्य् क्वचाल ।

संस्थाया छ्यान्जे गुजय सिंह न्ह्याकादीगु उगु ज्याभ्व:या सभानायो समाजया नायो हिरा बहादुर महर्जन ख:सा मूपाहाँ कीर्तिपुर नगरपालिकाया मेयर रमेश महर्जन त्वारवाल्य मत च्याका उलेज्या यानादीगु ख: । मेपिं पाहाँपिं पूर्व राज्यमन्त्री दिलिप महर्जन, एक्सन एड नेपालया अमरेस, होमनेट नेपालया चन्द्रमाया महर्जन, सल्लाहकार नन्दकुमारी महर्जनपिं भायादीगु ख: ।

लसकुस न्वचु समाजया न्वकु विना महर्जनं वियादीगु ख: । अथेहे आर्थिक प्रतिवेदन समाजया कोषाध्यक्ष सुनिल कुमार महर्जन न्ह्यब्वयादीगु ख: । वार्षिक प्रतिवेदन नायो हिरा बहादुर महर्जन प्रोजेक्टर मार्फत स्टाइड शो याना न्ह्यब्वया दिल् । नापं छ्यान्जे गुजय सिंह नं समाज थौतक याना वयाच्वंगु ज्याखँ व प्रगतिवारे प्रोजेक्न मार्फत बयान यानादीगु ख: ।

जनसेवा मा.वि.या प्राचार्य नन्दकुमारी महर्जनं सामुदायिक विकास समाज गठन लिपा उगु संस्थां याना वयाच्वंगु ज्या तसकं बांला, नायोया प्रतिवेदनय् दुमथ्या:गु समाज गठन जुइ न्ह्य: पाँगाय् हरेक वडाय् विपद व्यवस्थापन समिति गठन याना: उगु समितित पाखें या:गु ज्याया वर्णन यानादिल् ।

एक्सन एडया प्रतिनिधि अमरेशजीं नं समाज तसकं बांलाक ज्या यानाच्वंगु जुया थ्व संस्था निरन्तर जुइगु खँय् आशा प्वका: दिल् ।अथेहे पुलांम्ह राज्यमन्त्री दिलिप महर्जनं समाज गठन लिपा समाज याना वयाच्वंगु ज्यायात च्छाया दिल् ।

मूपाहाँ मेयर रमेश महर्जन थ:गु नुग: खँ तयगु भ्वल्य् किपू नगरपालिकां विपन्न परिवारयापिं ७० म्ह भूकम्प पिडित पिनिगु निंति भौतिक ग्वाहालि यायेगु योजना दुगु खँ कनादिल् । किपुली लालपुर्जा मदया: यक्वसें छुं हे ग्वाहालि काये मखनाच्वंगुलिं आ: वडाया सर्जमिन व सिफारिसया आधारय् नं भुखाचं पिडितपिन्सं ग्वाहालि कायेखनीगु नं कनादिल् । अथेहे ल:या मुहान दुगु दुरुपुखु, सीम भ्रवाहिति लागयात सिमसार क्षेत्र घोषणा यानां ल:या मुहान सुरक्षा यायेगु योजना कनादिल् । ल:या निंति १९ करोड धेवा फ्यानागु कनादिसें याकनं किपुली ल:या समस्या समाधान यायेगु जुइ धयादिल् ।

सामाजिक सुरक्षा भत्ता कायधुंकूपिं ज्येष्ठ नागरिकपिन्त डाइबेटिक, ब्लड प्रेशरया वास: सितिकं इनेगु योजना कथं सर्वे यानाच्वनागु न्ह्यथनादिसें सायद कार्तिक मंसिरपाखें निसें वास: इनेगु जुइ धयादिल् । अथे हे पाँगाय् च्वंगु वडा नं.८ ज्याकू तसकं मछिंथाय् लानाच्वंगुलिं वडावासीपिन्सं वडा ज्याकूया व्यवस्था बांलाथाय् यानादीत इनाप याना दिल् ।

सभानायो हिराबहादुर महर्जनं सकसितं सुभाय् देछानां सभा क्वचाय्का दिल् ।

## यलय् थुगुसी नं त:जिक जुल नरसिंह जात्रा

यलया राजोपाध्याय ब्राम्हणपिनिगु उपाकर्म गुथि अन्तर्गत दैय् दसं भाद्र कृष्ण पंचमिया दिं न्ह्यानाच्वंगु नृसिंह जात्रा (उपाकलं साया:) शनिवा: नृसिंह जात्रा जुगु दु । त:जिक पूजा याये धुंका: नृसिंह जात्रा यलया मंगलबजारय् च्वंगु भिन्ध: देग:या न्ह्य:ने तुइलाक्वय् न्ह्याकुगु ख: । थुगु जात्रा न्ह्यायेकेगु निंति नृसिंह जात्रा समारोह समिति निस्वना त:गु दु ।

यलया नेवा: समुदाय दुने नं राजोपाध्याय शर्मा समुदायपाखें दैय् दसं गुंलागा पंचमिया दिनय् अथे नरसिंह जात्रा पिकायेगु याना वयाच्वंगु दु । जात्राया इलय् खा:पा: पुया थीथी लागा चा:हिलीगु ख:सां थुगु यात्रायात नरसिंह जात्रा धायेगु याना वयाच्वंगु दु । दैय् दसं यलया काति दबुलिइ कार्तिक महिनाय् क्यनीगु ऐतिहासिक प्याखं काति प्याखं अर्थात कार्तिक नाच नाप नं स्वापू दुगु थुगु जात्रा धइगु यलया छगू महत्वपूर्णगु संस्कृति जुयाच्वंगु दु ।

## नेपा: राष्ट्रिय पार्टीया न्हूम्ह नाय: डा. सैजु



### ज्वजलपा वा:पौ

नेपा: राष्ट्रिय पार्टीया निक्व:गु त:मुज्या शनिवा: येँ जुगु दु । पार्टीया कार्यवाहक नाय सुवर्ण केसरी चित्रकारया सभानायासुई जुगु उगु ज्याभवल्य् सताब्दी पुरुष सँस्कृतिविद डा सत्यमोहन जोशी मूपाहाँ जुयादिगु ख: ।

अथेहे ज्याभवल्य् जनकवि दुर्गालाल श्रेष्ठ, डा.महेशमान श्रेष्ठ, नेवा: देय् दबूया नाय नरेश

ताम्राकार, ज्यापू महागुठीया नाय राजभाई जक:मि लगायत थीथी ब्यक्तित्वपिं उपस्थित जुयादिगु ख: । ज्याभव:या उलेज्या मूपाहाँ सस्कृतिविद डा.सत्यमोहन जोशीं यानादिगु ख: । २०६४ सालय् नीस्वंगु नेपा: राष्ट्रिय पार्टी सविधान सभाया न्हापांगु व निगूगु चुनावय् ब्वति का:गु ख:सा थुगु निगू चुनावय् समानुपातिक मतपाखें छम्ह छम्ह सभासद जुइत ता:ला:गु ख: । वंगु स्थानीय तहया चुनाव धा:सा बहिष्कार या:गु ख: ।

ज्याभवल्य् थीथी ब्यक्तित्वपिन्स थ:थ:गु नुग: खँ तयादिगु ख: । ज्याभव:या न्हापांगु ज्याभव: क्वचाये धुंका: बन्द सत्र जुगु ख: । बन्द सत्रपाखें न्हूगु नेतृत्व ल्येयेगु ज्या तकं जूगु ख: । न्हूगु नेतृत्व कथं नेपा: राष्ट्रिय पार्टीया न्हूम्ह नाय: डा. विजय सैजु जुयादीगु दु । आ: प्रदेश व प्रतिनिधिसभाया चुनावय् सहभागी जुइगु कथं नेपा: राष्ट्रिय पार्टी तयार याइगु जूगु दु ।

## खुदं लिपा बुद्ध मूर्ति नँयागु बारं पिहांवइगु जुल

### ज्वजलपा वा:पौ/

किपूया गुतपौ त्वाल्य् च्वंगु त्रिरत्न विहारया ग्वसालय् १६ भिंखुगु फीट त:धीम्ह प्यम्ह बुद्ध मूर्ति दयेकेगु योजना तल । बुद्ध मूर्ति दयेकेत मा:गु ली, सिज: दान विइत विहारं आब्हान या:गु कथं किपू, पाँगा, नगां सकभनंयापिं श्रद्धालुपिन्सं थ:गु छें दुगु ली, सिज:या थलबल फुफुम्हसें फुफुकथं दान बिल् । प्यम्ह बुद्धया मूर्ति दयेकेगु ज्या न्ह्यात । उकी मध्ये निम्ह बुद्ध भगवानया मूर्ति तयार जुल् । तर व मूर्ति गन तयेगु धइगु क्वछी मफया: अथवा तयेधा:थाय् तयेयंके मफया: गुतपौ त्वा:या छखा छें न्ह्योने तया: नंया बारं खुया: तयातल् ।

अथे नंया बारं खुया लैय् अथें तया:तगु खुदं दत् । निदं न्ह्य:या त:भुखाचं व मूर्ति तया:तगु छें दुनांवल । आ: व छें दयेकेत व मूर्ति मचिइकुसे मगात ।

थुगुसी वंगु वैशाख ३१ गते स्थानीय तहया चुनाव जुया न्हूपिं



जनप्रतिनिधित वल् । उगु लागा की.न.पा. वडा नं.१० लागाय् ला: । वडा नं.१० या वडाध्यक्ष अमन महर्जनया कृतलं आ: व बुद्ध मूर्ति किपूया पूर्वपाखे स्व:गु जलख्य:चाय् तयेयंकेगु कुत: जुयाच्वंगु दु ।

जलख्य: नं किपूया ऐतिहासिक महत्वं जा:गु ख्य: म्हासय् यानां बुद्ध मूर्ति तयगु लाकि छु धइगु ज्वजलपा वा:पौया

न्ह्यस:या लिसलय् वडाध्यक्ष अमन महर्जनं धयादिल्, “जलख्य:चित म्हासय् याना मखु वया क्वसं च्वंगु खाली थासय् पलिस्था यायेगु जुइ । थ्व नं किपूया शान जुइ । सूर्य लुइवं निभा: खइगु थासय् येँ, यर्लिनसें खनेदइगु थासय् तयेत्यनागु ।” जुलुम शाक्य नं मंजुर वियादीगु दु ।





# श्रद्धाया स्वां देछाया



बूगु दिं :  
२००२/०५/२५



मदुगु दिं :  
२०७४/०४/१८



मदुम्ह मिश्री महर्जन

जिमि जहान/मां मिश्री महर्जन वंगु श्रावण १८ गते मत्यवं मदुगु  
थौं भिनिन्हु(घ:सू)या पुण्यतिथिसं मदुम्हेसिया चित्त शान्ति जुया: सुखावति भुवनय्  
वास लाय्मा धका: कामना यासैं श्रद्धाया स्वां देछाना च्वना ।

जहान: नन्दलाल महर्जन  
केहैं : ज्यानमाया महर्जन  
किजाभत : नाती महर्जन

म्हयाय्पिं / जिलाजं  
मन्दिरा महर्जन - ज्ञानवहादुर महर्जन

म्हयाय् / जिलाजं  
इन्दिरा महर्जन - कृष्णवहादुर महर्जन  
म्हयाय् / जिलाजं  
नान्दिरा महर्जन - रबी महर्जन  
म्हयाय् / जिलाजं  
ज्ञान्दिरा महर्जन - कबिर महर्जन

काय् / भौ  
राजकुमार महर्जन - बिमला महर्जन

काय्चा / भौ  
ज्ञानेन्द्र महर्जन - अमिता महर्जन

म्हयाय्चा / जिलाजं  
ज्ञानशोभा महर्जन - दयाराम महर्जन

छय् / जिलाजं  
मनिता महर्जन - रिकेश महर्जन  
ज्ञानराज महर्जन  
छय्पिं  
रोजी महर्जन / रुमी महर्जन  
छय्पिं  
सुदिक्षा महर्जन / निर्जल महर्जन  
छय्पिं  
करिन महर्जन

छय्  
बनेश महर्जन

छय्पिं  
अनुराग / लस्ता महर्जन

छय्पिं  
रितिका / पियुष

# चिचीहाकलं बुखँ

### क्वाति पुन्हि हन

स्वनिगःया आदिवासी नेवाःतय्सं सोमवाः गुंपुन्हि नखः थःथःगु परम्परा कथं हंगु दु । गुंपुन्हियात क्वाति त्वनेगु नखःया रुपय् नेवाःतय्सं हंगु दु । गुंलाया पुन्हि जुया गुन्हुपुन्हि नं धायेगु याना वयाच्चंगुलि क्वाति त्वनेगु दिं खुन्हु थीथी कथंया बुवःयात फ्वया क्वाति दायेका त्वनेगु नखः हे क्वाति नखः खः । बर्षा ऋतुया इलय् लाइगु गुपुन्हियात गुंपुन्हि नं धायेगु याना वयाच्चंगु दु । नकर्तिनि जक सिनाज्या क्वचायेका हनीगु नखः जुया क्वाति पुन्हि खुन्हु विशेष याना शरिरया नितिं माःगु पौष्टिक तत्व नयेगु नखः कथं हना वयाच्चंगु दु । तःग्वःगु कयगू, चीग्वःगु कयगू, मुस्या, भुति, ग्वःमाय्, ग्वःमू, चाना, मस्यां, सिम्पुयात गुता बीबः धाइसा मेमेगु नं दुथ्याका क्वाति दयेकेगु याइ । क्वाति दयेकीगु इलय् चिकनय् क्वाति भ्वाँय् याइ वा लखय् दायेकेगु याइ । अले लबा, पालु, जी, छ्वाः, हलू, चि निसें माःमाःगु मसला तया दायेकेगु याइ । क्वति वुइ धुंकाः इमू क्वयेका भ्वाँय् याइ अर्थात चिकं ह्वाइ । अले क्वाति तयार जुइ । क्वातिया सवाः छगू ब्यागलं कथंया सवाः जुइ । क्वातिया तिया छगू मंकाः सवाः जुइसा अले क्वातिइ दुने दुगु बुवः छगः छगः न्हयल धाःसा उकिया थःथःगु हे सवाः दयाच्चनी । क्वति नइगु इलय् मरि नं नयेगु याइ । अथे जुया क्वाति नाप छुंचू मरि नाप नं स्वापू दयाच्चंगु खने दु । उकिं क्वाति धइगु विशेष प्रकारया नसाया रुपय् नं कायेगु याना वयाच्चंगु दु । मेमेगु इलय् त्वनी मखुगु क्वति गुंपुन्हिया हे दिनय् त्वनेगु याइ ।

### ब्यांजा नकल

नेवाःतय्सं दैय् दसं थें गुंपुन्हि खुन्हु सोमवाः ब्यांजा नकल । ब्यां स्वांलय् जा तया वुँइ वना ब्यांचित जा नकः वनेगुयात हे ब्यांजा नकेगु धाइगु खः । वुँइ वा पिइगु ज्या क्वचाये धुंकाः वाम्हा तःम्हा जुया वःगु अवस्थाय् वुँइ वइपिं थीथी कथंया कीयात नइपिं ब्यांचित जा नकेगुया अर्थय् ब्यांजा नकेगु याना वयाच्चंगु खः । ब्यांजा नकीगु इलय् मूल रुपं ब्यांस्वांया हः, भुतिहः बाय् मुस्या हलय् तया ब्यांचित जा नकीगु खः ।

क्वाति, मरि, भुति, पासी, तःसी, लैं, तुसि, जाकि, ला, स्वां, सिन्हः, मरिनिसें जा तकं तया थःथःगु वुँइ यंकाः ब्यांचित जा नकीगु खः । गुलि गुलिसिनं फसिच्चः व फकं त्वाकाछुयाना दयेकातःगु ककंचा कें तकं तया ब्यांचित ब्व तइ । थःथःगु वुँइ यंका ब्यांचित नकेगु नाप नापं थःथःगु छेंया लुखानिसें भ्क्याः पतिकं अले थःथःपिनिगु लागाय़ा स्थानीय द्यःथाय् तकं ब्यांचित जा तःगु थें हे लपते तया छायेगु याइ । मेमेगु दिनय् सिबें पाक्क द्यःपिन्त ब्यांचित भाग तःथें हे लपते तया छाये यंकीगु चलन दु । नेवाःतय्गु विस्कं कथंया नखःया रुपय् ब्यांजा नकेगु याना वयाच्चंगु दु । नेवाःतय्सं दैय् दसं गुंलाथ्व पुन्हि खुन्हु ब्यांजा नकेगु याना वयाच्चंगु दु । नेवाः समाजय् ब्यागलं कथंया महत्व दुगु, वुँज्या नाप स्वापू दुगु संस्कृति धइगु हे ब्यांजा नकीगु खः ।

### सिलु तिर्थय् मेला

गुंपुन्हिया इलय् स्वनिगः पिने बागमती अञ्चल दुनेया उत्तर दिशाय लाःगु रसुवा जिल्लाय् लाःगु तसकं महत्वपूर्णगु सिलु तिर्थय् मेला जुइ । तसकं महत्वपूर्णगु उगु तिर्थ धइगु तसकं च्वय् लाःगु छगू कथंया कुण्ड खःसा उगु कुण्डय् तःधंगु पुण्य लाइ धइगु मान्यता दु ।

सिलु निम्हत्यपु वने मजिउ धाइगु मान्यता दु । निम्हत्यपू वन धाःसा निम्हत्यपु बाय् माली धइगु मान्यता दु । इतुंबहाःया परम्परा कथं नालातःम्ह गुरुमांपा वहे सिलु तिर्थयाम्ह जूगु व इतुम्बहाः व गुरुमांपाः न्हापा बांलाःगु स्वापू दुगुलिं इतुंबहालयु छें दुपिं वने मजिउ धइगु मान्यता दु । नेवाःतय्सं तःधंगु तिर्थया रुपय् नालातःगु अले दक्खिया छकः वनेगु याना बायच्चंगु सिलु तिर्थ धार्मिक रुपं जक मखु प्राकृतिक रुपं नं महत्वपूर्णगु तिर्थया रुपय् नालातःगु दु ।

### क्वन्तिइ मेला

गुन्हुपुन्हीया छन्हु न्ह्यः आइतवाः बहनीनिसें यलया क्वन्ती महाद्यःथाय् तःधंगु मेला जूगु दु । कुन्ति महाद्यःयात कुम्भेश्वर महाद्यः नं धायेगु याना वयाच्चंगु दु । आइतवाः बहनीनिसें सोमवाः तक अन मेलाय् दर्शन याय्त आपलं हे मनूत वन । चान्हय् हे पुखुलिइ महाद्यःया मूर्ति तइगु खःसां जात्रा धाःसा पुन्हि खुन्हु विशेष कथं याइ । कुम्भेश्वर महाद्यःया मूर्ति अथे पुखुलिइ तइगु खः ।

थ्यमथ्यं स्वंगू फिट दुगु उगु मूर्ति तया पुजा याइगु अले तःजिगु जात्रा तकं याइगु खः । उगु पुखूया लः सिलु तिर्थपाखें वयाच्चंगु लः धकाः नं धायेगु याः ।

कुम्भेश्वया पुखूयात सिलु तिर्थया लः वयाच्चंगु पुखू धकाः धायेगु याना वयाच्चंगु खः । अथे हे सिलु तिर्थय् वनीगु इलय् हे क्वन्ति महाद्यःया पुखिलुइ लः जाया वइगु जुया नं सिलु तिर्थ नाप स्वापू दुगु पुखू नं धायेगु याना वयाच्चंगु दु । उकिं सिलु तिर्थय् म्वः ल्हुइगु भ्क्वलय् गुलि पुण्य लाइगु धार्मिक मान्यता दु कुन्ति महाद्यःया पुखुलिइ म्वः ल्हुइगु इलय् उलि हे पुण्य लाइ धइगु मान्यता नं दु । मेलाय् स्वनिगः व स्वनिगलं पिनेया भक्तजनपिं नं वंगु दु । चान्हय् कुम्भेश्वर देगःया महाद्यःया मूर्तियात अन च्वंगु पुखुलिइ पुजार ीतय्सं तइगु चलन दु । द्यः खतय् अथे महाद्यःया मूर्ति तइगुयात पुजा याइगु हे उगु मेलाया दक्ले आकर्षण खः । उगु इलय् पुखुलिइ धलंब्वानाच्चीपिं नं यक्व दइगु खः ।

### तःगःजाकि चीगःजाकि ब्वज्या

गोपिचन्द्र महाविहारय् आल्कोय् तःग्वःगु छगः व चीग्वःगु निगः जाकि ब्वयातःगु दु । इखाछें बहिलिइ उगु कथं तग्वःगु जाकी व चीग्वःगु जाकि ब्वज्या याःगु खः । दैय् दसं गुंपुन्हि खुन्हुनिसें स्वन्हु तक उगु कथं तःग्वः जाकि ब्वइगु चलन दु । वाकसय् तया जाकी ब्वया तइगु खः । चिग्वःगु जाकि हलः पाय्ग्वःगु जाकी खःसा तःग्वःगु जाकि गुच्चा पाय्ग्वःगु जाकि खः । थुगु हे हाक्या जाकि खः । थ्व जाकि धइगु सत्य युगया जाकि धकाः धाइ । थुगु कथंया जाकि मेमेगु थासय् गनं नं खने मदु । उगु जाकियात पुजा याना ब्वज्या याइगु खः । थुगु जाकि मेमेगु इलय् ब्वये मजिउ धाइगु मान्यता नं दु सा दिपंकर द्यःया न्हयःने अथे जाकि ब्वइगु खः । न्हिया न्हिथं अथे स्वन्हु तक तःग्वःगु जाकि चीग्वःगु जाकी ब्वयातःगु स्वयेगु नितिं मनुत वयाच्चनी । मतयाः वइपिन्सं स्वया वनी । जा थुइगु इलय् न्हापा गपाय्ग्वःगु थलय् उगु जाकि तया जा थुल थल अपाय् ग्वः हे जाकी जुइ धइगु मान्यता दु । अथे जाकि ताना नइगु जुया हे जा तायेगु धकाः धाःगु खः धाइपिं नं मदुगु मखु । लिपा वया जक थौकन्हय् मनूतय्सं नइगु जाकी वःगु खः धाइ ।

### गुइत नकिं ब्वज्या

दैयदसँ थें थुगुसि न गुइत नकिंया ब्वज्या यागु दु । दक्छि छन्हु जक यलया गुइत्वालय् गुइत नकिं ब्वइगु चलन दु । दिपावती महाविहार नं धायेगु यानाच्चंगु गुइतः बहिलिइ सोमवाः गुंपुन्हि खुन्हु अथे ब्वज्या याःगु खः । यलय् थःम्हेस्यां हे अन्न मुंकाः दिपंकर बुद्धयात दान बिइगु ज्या याःम्ह धाइम्ह गुइत नकिं खः धइगु मान्यता दु । धार्मिक मान्यता कथं श्रवणकुमार जुजुं तत्कालिन अवस्थाय् दानसाला दयेका दिपंकर तथागतयात दान बिउगु अवस्थाय् दक्ले न्हापां जुजुयाके मकासे गुइत अजियाके दान काःगु जुया अबलेनिसें यल पञ्जरां सुरु जूगु धइगु मान्यता दु । गुइत अजिमायात हे गुइत नकिं धकाः दैय् दसं ब्वज्या याना वयाच्चंगु दु ।

### सायाः

नेवाःतय्सं शुक्रवाः तःजिक सायाः नखः हंगु दु । दैय् दसं गुंलागा पारु खुन्हु अथे सायाः नखः हनीगु खः । नेवाःतय्गु वस्ती यें, यल ख्वप नापं स्वनिगःया थीथी नेवाः वस्तीइ थःथःगु कथं अथे सायाः नखः हंगु खः । दक्छिया दुने मदुपिनिगु नामय् छेंजःपिन्सं मनूयात हे सा याना पिथनीगु सायाः धइगु छगू कथं न्ह्याइपुकेगु नाप नापं मदुपिनिगु लुमन्तिइ पिथनीगु तःजिगु यात्रा खः । थुगु यात्रा धइगु सायाः खःसा सायाःयात हे सापारु नं धायेगु याना वयाच्चंगु दु ।

मल्लकालनिसें सुरु जूगु कथं नालातःगु सायाः धइगु स्वनिगःया नेवाःतय्सं जक मखु स्वनिगलं पिनेया नेवाः समुदायपाखें नं हना वयाच्चंगु दु । गन गन नेवाःत दु अन अन थःथःगु हे कथं सायाः नखः हनेगु याना वयाच्चंगु दु । स्वनिगः दुने जक मखु स्वनिगलं पिने नं हनीगु नखः जुया उकिं सायाः धइगु नेवाःतय्गु मंकाःगु नखः जुयाच्चंगु दु । थ्वःहे भोलय् मंगलवाःहे यलया प्यंगः थुर कार्वनिगु चलन दु । यलया ईःबहि थुर, त्यःता थुर, लगःथुरु व पुच्वः थुरु कार्वनिगु याइगु खः । अथे थ्वः दिं खुन्हु थुरु कावन धासा तःधंगु धर्म लाईगु नं जनविश्वास दु ।

### ख्वप सायाः

सायाः नखः हनेगु भ्क्वलय् मंगलवाः ख्वपय् धिंतांकिंसि प्याखं पिथंगु दु । ख्वपय् ताहा सा दयेक अथे सायाः पिकाइगु चलन दु । दक्छिया दुने मदुपिं मनूतय्गु नामय् अथे ताहा सा दयेका पिकइगु

खः । मिजंम्ह मदुगु जूसा मिजपिन्सं हे पुनीगु वसः अले मिसापिं मदुगु जूसा मिसापिन्सं हे पुनीगु वसः तया पंया भिंन्याक् हाकःगु सा दयेका नगर परिक्रमा याकीगु खः । सायाःया भ्क्वलय् ब्यागलं कथंया सायाः पिकाइगु चलन दु । अथे त्वाः त्वालं पिकइगु उगु कथंया सायाः नगरया थीथी लागाय् चाःहिलीगु चलन दु । कथं त्वाकाः पिकइगु न्ह्याइपुगु प्याखं धइगु हे धिंतांकिंसि प्याखं खः ।

### थेच्चय् त्वाना जात्रा

सापारु अर्थात सायाः खुन्हु हनीगु थीथी ज्याभवःत मध्येय् मंगलवाः नेवाः बस्ति थेच्चय् त्वानाः क्वफायेगु जात्रा तजिक यागु दु । थ्यमथ्य भिर्दीनसे दिनाच्चंगु उगु जात्रा वंगु दँ निसे हाकन सुरु यागु खः । थःगु तनाच्चंगु सँस्कृति म्वाकाः तयेमा धकाः थेच्चया ल्याय्म्हतय्गु कुतलं उगु सस्कृतियात अथे निरन्तरता विइगु ज्या जुगु खः । न्हापा न्हापा तुं दुगु व उगु थासय् च्वंगु लः न्हिज्याया नितिं छय्रलिगु जुया सुचुकुचु यायेगु कथं स्वाका उगु जात्रा न्हयाकाः वयाच्चंगु थेच्चया सास्कृतिकःमिपिनिगु धापू दु । छुं दँ न्ह्योनिसे उगु पुखुया लः फोहर जुया थुगु जात्रा दिना च्वंगु खःसां नं थुगु मौलिक तजिलजि न्ह्याकेगु नापं उगु थाय्‍यात सुचुकुचु यायेगु तातुना उगु जात्रा न्ह्याकुगु धकाः ल्यायुम्ह पुचलं धाःगु दु । जात्रा न्ह्याकेगु भोलय् त्वानाः क्वफायेगु धंकाः स्वयाच्चीपिं मध्येय् सु सु मदु उपिं लालकया त्वाना माला हयेगु ज्या याईगु खः । उगु त्वाना क्वफाये न्ह्वः न्ह्याम्हेस्यां नं त्वानाःया थुलि ध्यवा धकाः कबुल याना क्वफायेगु याइ । त्वानाः कया हःम्हेसित अले कबुल याःगु कथंया ध्यवा विइ । जात्रा क्वचाये धंका जात्राय् लालकया त्वाना माःवपिन्त भ्वय नकीगु याई ।

### गुइत धँलाय् हिति ब्वज्या

दक्छि छन्हु जक यलया गुइत्वालय् धँलाय्हिति ब्वइगु चलन दु । दिपावती महाविहार नं धायेगु यानाच्चंगु गुइतः बहिलिइ मंगलवाः धलाय् हिति ब्वज्या याःगु खः । दक्छिया छन्हु जक ब्वइगु उगु धँलाय् हिति धइगु तसकं आकर्षक खने दु । दक्छिया दुने छेंजः मदुपिं मनूत वया उगु धँलाय् हिति स्वयेगु याइ ।

सायाःया भ्क्वलय् धँलाय् हिति चाःहिउ वनेगु व सीपिनिगु नामय् मत च्याकेगु नं चलन दु । धँलाय् हिति धइगु मनूत सिइ न्हयः अन्तिम इलय् धँलाय् हितिया लः त्वंकीगु अले व लः त्वन धाःसा मनू सिइगु मान्यता दु । उकिं थःगु जीवनय् छकः धँलाय् हितिया दर्शन यायेमाः धइगु मान्यता दु । धँलाय् हितिया नामं हे सापारुयात नेवाःतय्सं धज्या पुन्हि धकाः नं धायेगु याना वयाच्चंगु दु ।

थ्व हे भ्क्वलय् गुइत त्वालय् गुइत नकिं नं ब्वज्या याइगु चलन दु । दक्छिया दुने गुइत नकिं नं ब्वइगु मौलिक कथंया चलन खः । यलय् थःम्हेस्यां हे अन्न मुंकाः दिपंकर बुद्धयात दान बिइगु ज्या याःगु धइगु मान्यता दु । धार्मिक मान्यता कथं श्रवणकुमार जुजुं तत्कालिन अवस्थाय् दानसाला दयेका दिपंकर तथागतयात दान बिउगु अवस्थाय् दक्ले न्हापां जुजुयाके मकासे गुइत अजियाके दान काःगु जुया अबलेनिसें यल पञ्जरां सुरु जूगु धइगु मान्यता दु । गुइत अजिमायात हे गुइत नकिं धकाः दैय् दसं सापारु खुन्हु ब्वज्या याना वयाच्चंगु दु ।

### तोखा सायाः

सापारु नखः हनेगु भ्क्वलय् नेवाः वस्ती तोखाय् नं मंगलवाः सायाः पिकाःगु दु । ऐतिहासिक वस्ती तोखाय् सायाः पिकायेगु ज्या निगू थासं ब्यागलं ब्यागलं कथं याःगु खः । तोखाया थन्खे व कुन्खे याना निगू थासं साःया पिकाःगु खः । मनू सीगु प्रत्येक छेंखाप्चाः पतिकं दोको कुबिया, निम्ह सा नापं छम्ह धुन च्याका मचा पिकाइगु चलन दु । मचाम्ह सीगु छेंपाखें जूसा धुनि च्याका वइम्ह मचा छम्ह जक पिकाइगु चलन दु । धिमे बाजं थाना उगु कथं सायाः पिकाइगु चलन दु । अथे सायाः पिकाइगु इलय् बजि ल्हुइगु लुसि ज्वना वयेमाःगु चलन दु ।

### प्याः पुखू छिइगु

साया अर्थात सापारु खुन्हु थीथी थासय् मेला जुइगु नापं थःथःगु कथंया चलन दु । थ्व हे भ्क्वलय् सापारु खुन्हु यलय् पुखू छिइमाःगु नं चलन दु । यलय् प्याः पुखू छिइगु चलन दु । प्याः पुखुलिइ लः मदुसां भच्चा भच्चा लः तया अथे छिइगु ज्या याइगु खः । पुखुलिइ दथुइ यमराज द्यः दुगुलिं उम्ह द्यःयात दर्शन याइगु चलन दु । दक्छिया दुने छेंजः मदुपिन्सं अथे खुसि छिइगु चलन दु । पुखुलिइ मत च्याकीगु नं चलन दु । उगु पुखू छिना वये धुनला धकाः यमराज देव न्यनीगु धइगु जनधारणा दु ।

## बिचा: हायेका

बूगु दिं  
वि.सं.१९७९



मदुगु :  
२०७४/०४/१७



मदुम्ह राम महर्जन



जिमि स्यान्याम्ह पासा रामप्रसाद महर्जनया  
हनेबहःम्ह अबुजु राम महर्जन (ह्वाकुंचा, किपू-१) वंगु साउन १७  
गते ९५ दँय् मदुगु थौं १३ औं (भिंस्वन्हु)या पुण्यतिथिसं चित्त शान्ति  
जुया सुखावति भुवनय् बास लाय्मा धका: श्रद्धाया स्वां छपास:  
देछाना च्वना । नापं थ्व दुःखया इलय् सकल छँजःपिन्सं मन  
चिइफय्मा धका: बिचा: हाय्का च्वना ।

## बिचा: हाय्कूपिं

भाजु/मय्जु - सुजन गोपाल प्रधान

भाजु/मय्जु - संजय महर्जन

भाजु/मय्जु - सुनिल महर्जन

भाजु/मय्जु - दिलिप महर्जन

भाजु/मय्जु - राकेश महर्जन



# बिचा: हायेका

बूगु दिं  
वि.सं.१९७९

मदुगु :  
२०७४/०४/१७



मदुम्ह राम महर्जन

जिमि स्यान्याम्ह पासा रामप्रसाद महर्जनया

हनेबहःम्ह अबुजु **राम महर्जन** (ह्वाकुंचा, किपू-१)

वंगु साउन १७ गते ९५ दँय् मदुगु थौं १३ औं (भिंस्वन्हु)या  
पुण्यतिथिसं चित्त शान्ति जुया सुखावति भुवनय् बास लाय्मा धका:  
श्रद्धाया स्वां छपासः देछाना च्वना ।

नापं थ्व दुःखया इलय् सकल छँजःपिन्सं मन चिइफय्मा धका:  
बिचा: हाय्का च्वना ।

**समन महर्जन**

**सुजन गोपाल प्रधान**

**राजकुमार महर्जन**

**रमेश तण्डुकार**

**पचली भैरव एण्ड मनकामना निर्माण सेवा प्रा.लि**



# चिचीहाकलं बुखँ

### बुङ्ग्य मतया

गुन्हपुन्हिया लसताय् सोमवा: यलया नेवा: वस्ती बुङ्गय् मतया: पिकाल । न्हियान्हिथं मनु नइम्ह दैत्यपाखें बुङ्गमितय्त बचे यायेगु धासें गुन्हपुन्हिया सुथसिया ब्यांचित जा नकुसें, सनिलय् दिवंगत जूपिनिगु आत्माया चिर शान्तिया कामनायासें मदुपिं मनुतय्गु छेंज:पिन्सं मतया: पिकायेगु याना वयाच्वंगु दु ।

इपिं बाहेक मेपिं मनुत परिवारया सुस्वास्थ, दिर्घायुया कामनायासें ब्वतिकाइगु चलन दु । उगु मतयालय् नेवा: वस: पुना मस्त, मिस्त, ल्यासे ल्याय्म्हपिं नापं बर्खी च्वनाच्वपिं सहभागी जुइगु ख: । मतया बुङ्गया थीथी द्य:, देग:, चुक, बहाबहि, लाछि ननि मत व्युब्जुं छेंय् दुगु थीथी अन्न छाया चाट्यू वनीगु ख: । उगु यात्राय् बुङ्गया नेवा:त नापनापं ज:लाख:ला वस्तीया नेवा:त नं सहभागी जूगु ख: । उगु यात्रा बुङ्गय्या बुङ्गद्य:या बहालनिसें न्ह्याका कोटा त्वा:, च्वलय् ननि, छयासीकोट, ज्याउलाख्य: जुया हाक: नं बहालय् वना क्वचा:गु ख: ।

### थेच्च मतया:

साया:या कन्हय् खुन्हु बुधवा: स्वनिग:या नेवा: वस्ती विशेष याना यल जिल्ला दुने थीथी थासय् थ:थ:गु कथंया मतया: नख: हंगु दु । थ्वहे भ्त्वलय् बुधवा: नेवा: वस्ती थेच्चय् मतया: नख: हंगु दु । थुगुसीया मतया थेच्चय् नीक्व:गु मतया: ख: । थेच्च: सांस्कृतिक बाजा संरक्षण समितिया संयोजनय् थेच्च:या थीथी भिनिगू बाजं खल: तय्सं पालंपा: ग्वसा: ग्वइगु भ्त्वलय् थ्व दैय् मालिगाँ दाफा खलकं ग्वसा: ग्व:गु ख: ।

अथेहे मेगु दैया निति नवदुर्गा धिमे खल:यात पा: विउगु दु । बाजागाजासहित ख्याल: ब्वज्या कथं अथे मतया: या:गु ख: । मतया:या भ्त्वलय् थीथी कथं सामाजिक व राजनीतिक रुपं ध्याचू नका: अथे ख्याल: क्यना व:गु ख: । अथेहे बाजा गाजा सहित प्याखं ल्हुया व:गु ख:सा ब्व छायेगु लिसें लाखे प्याखं तकं ल्हुया व:गु ख: । मतया: थेच्च:या थीथी लागाय् चा:हिलेगु ज्या जूगु ख: । अथेह मतया ज्याभव: क्व:चायेधुंका छगू ज्याभव: यासें मतया:लय् बा:लाक व:पिन्त सिरपा नं ल:ल्हा:गु ख: । थ्वहे भ्त्वलय् नवदुर्गा धिमे खल: न्हापा ला:गु ख:सा न्ह्यछें दाफा खल: ल्यू ला:गु ख: । अथेहे बा:लांम्ह मिसा, बा:लाम्ह मिजं व सुचु पिचु यानात:गु त्वा:यात नं सिरपा ल:ल्हा:गु ख: ।

### यल मतया:

गुन्हुन्हिया भ्त्वलय् सापारुया कन्हय् खुन्हु यल जिल्लाया थीथी नेवा: वस्तीइ मतया: पिकाइगु चलन दु । थुगुसी नं बुधवा: मतया: पिका:गु दु । थुगुसिया मतया: यलया नाग बहालं न्ह्यागु ख: । नागबहा: लागां सुथ न्हापां न्ह्या:गू मतया टंगल, लगनख्य, ह:खा: बहा, पूर्णचण्डी, बुबहा:, गा:बहा:, नवहील, श्रीबहा:, नटोल, पुच्व: जूया नागबहालय् हे थ्यंका क्वचायेकूगू ख: । मतया:या भ्त्वलय् यलय् च्वंगू पुच्व:, लगंख्य:, ग्वार्कोया नापं प्यंगू थुर चाहीलेमा: । थूगुसीया मतया:य् थ्यंमथ्यं न्याढःम्ह मनूत सहभागी जूगु ग्वसाखलकं धा:गु दु ।

मतया: यलया मंगलवजा, सौग:, नागबहा: लगायत भिगू त्वालं पालंपा: व्यवस्थापनया जिम्मा कया न्ह्याकेगू यानावयाच्वंगु दु । मतया: धइगु मत च्याका वनीगु यात्रा ख: । मतया:यात न्यकु जात्रा नं धायेगु या: । यलया थीथी बहा: बही नापं प्यंग: थुर चा:हिलीगु यात्रा हे मतया: ख: । मतया:या ईलय् विशेष याना दच्छिया दुने मदुपिं छेंज:पिनिगु नामय् बहा: बही चा:हिलेगु नापं थीथी कथंया अन्न छायेगु चलन दु । मतया:या भ्त्वलय् म्हदाना वनीपिं नं म्हो मजू । अथेहे थी थी बाजं थाना नापनापं ख्याल: क्यना वइगु चलन नं दु ।

### थसि मतया:

गुंलागा दुतिया खुन्हु यल जिल्ला दुने ला:गु नेवा: वस्ती थसि अर्थात सिद्धिपुरय् नं त:जिक मतया: जूगु दु । थुगुसीया मतया: ज्याभ्त्व: मोहनी दाफा खल:पाखें ग्वसा:ग्व:गु ख: । उगु मतया यंगल त्वा:, द्य:ननि त्वा: लिसें थाय् थासय् चा:हिला यंगल त्वालय् हे थ्यंका: क्वचायेकेगु ख: । मतया:या भ्त्वलय् मनुत नेवा: वस: पुना मत विया वनेगु, भ्वय् ब्व छाया वनेगु, ख्याल: नं वनीगु नापं

सांस्कृतिक बाजं थाना चा:हिलीगु चलन दु । ढलंढःम्ह मनूत उगु मतया: ज्याभ्त्वलय् सहभागी जूगु ख: ।

मतया यात्राय् विशेष याना बहा: बही चा:हिलेगु अले थीथी द्य:याथाय् तकं चा:हिलेगु याइ । मतया: दैय् दसं त्वा: त्वालं पा: काइगु चलन दु । मतया:यात थसिया नेवा:तय्सं तसकं महत्व विया वयाच्वंगु दु ।

### जलय् द्य:पिं धरब्वाइगु

साया:या भ्त्वलय् जल हरिसिद्धिइ दैय् दसं थें थुगुसी नं द्य: पुखुलिइ द्य:पिं धरब्वायेगु ज्या जूगु दु । लाछिया द्य:पुखुलिइ जल प्याखंया सकल पुजारीपिं सापारुया कन्हय् खुन्हु दुतियाया दिनय् अथे धरब्वायेमा:गु चलन दु । उगु इलय् द्य:थाय् लाय् कया भ्त्व:छुना द्य: पुखुलिइ धरब्वायेमा:गु चलन दु ।

उत्तरदिशापाखें दक्षिणपाखे धरब्वाना वनीगु ख:सा अथेहे उत्तर ंदक्षिणपाखे धरब्वाइगु चलन दु । उगु इलय् सकल द्य:पिं धरब्वाये क्वचाये धुंका: छम्हेस्यां म्येय्या छ्यं कुविया धरब्वायेगु याइ । सलंस:म्ह मनूतय्गु उपस्थिति जूगु चलन यात द्य:पिं धरब्वाइगु धका: स्थानीय मनूतय्सं धायेगु याना वयाच्वंगु दु । उगु इलय् सर कारी प्रतिनिधि कथं वयेमा:गु चलन दुसा आ: स्थानीय जनप्रतिनिधिया उपस्थितिइ अथे धरब्वायेगु ज्या जूगु खः । उगु पुखुलिइ धरब्वात धा:सा सिलु तिर्थय् स्नान यानागु थें हे पुण्य वइगु धइगु जन विश्वास दु । अथे द्य:पिं धरब्वाये क्वचाये धुंका: मेमेपिं सर्वसाधार णत नं धरब्वायेगु याइ ।

### कंग: अजिमा देग: पुन: निर्माण

त:भुखाचं क्षतिग्रस्त सम्पदाया पुनर्निर्माणया ज्या लिपांगु इलय् सन्तोषजक कथं न्ह्यानाच्वंगु दु । पुरातत्व विभागं स्वनिग:या भूखाचं लिच्व:ला:गु नीन््यागु जिल्लाया पुरातत्विक सम्पदाया पुनर्निर्माण ज्यायात तीव्रता ब्युगु ख: । थ्वहे भ्त्वलय् बुधवा: यैया वडा नं. १९य् च्वंगु कंग: अजिमाया द्यग:या पुन: निर्माण ज्या न्ह्याकुगु दु ।

पुलांम्ह उद्योग मन्त्री साांसद नविन्द्र राज जोशीं पुन: निर्माण ज्याया सिलान्यास यानादिगु ख: । विभागं सच्छि व स्वीनिगु सम्पदाया पुनर्निर्माण प्रक्रिया न्हय:ने यंकुगु दु । भूखाचं स्वनिग: लगायत नीन््यागु जिल्लाया न्हय्स: व न्येय्गु पुरातात्विक सम्पदा ध्वस्त जुगु ख: । उकि मध्य थ्यंमथ्यं छगु दर्जनया जक पुनर्निर्माण ज्या क्वचाये धुंकागु दु । बौद्ध क्षेत्र विकास समितिं विश्व सम्पदा क्षेत्रय् सूचीकृत बौद्ध स्तूपया दकले न्हापा पुनर्निर्माण क्वचायेकुगु ख: । हनुमानध्वाखाया पञ्चमुखी हनुमानया देग:, कृष्ण मन्दिर व शिव मन्दिरया पुनर्निर्माण नं क्वचायेधुंकुगु दु ।

### जल साया:

साया: नख: हनेगु भ्त्वलय् नेवा: वस्ती जलय् नं थ:गु हे कथं साया हंगु दु । मङगलवा सापारु खुन्हु जलय् नं त:जिक साया: नख: हंगु ख: । दच्छिया दुने मदुपिनिगु नामय् मनूयात हे सा याना छवयेगु नापं ख्याल: क्यना वनीगु चलन दु । हरिसिद्धि नं धायेगु याना वयाच्वंगु जलय् दैय् दसं थें थुगुसी नं साया: पिका:गु ख: । जलया थाय् थासय् साया: चा:हिउगु ख: । अथे साया: वनीगु इलय् ख्याल: तकं क्यना वनेगु याइ । तसकं न्ह्याइपुक अभिनय् याना अथे जलय् ख्याल: पिहां वइगु ख: ।

### धरानय् सया:

सापारु नख: नेवा:तयगु विस्कं म्हसिका दुगु नख: ख: । सापारु नख: स्वनिग:लगायत नेवा:त गन गन दु अन अन हे थ:थरगु पह कथं हना वयाच्वंगु दु । थ्वहे भ्त्वलय् पूर्विय नेपा:या सूनसरी जिल्लाया धरानय् दैय्दसैं थें सापारु खुन्हु नेवा:तय्सं साया: पिकाइगु चलन दु ।

थुगु लागाया सायालय् विशेष आकर्षण धैगु थाकथुके प्याखँ ख: । स्वनिग:या ख्वपय् थ्यें कठ्ठी ल्वाका म्हितिगु प्याखँ हे थाकथुके प्याखँ ख: । थुगु प्याखँ सलसं दै न्हय:निसें न्ह्याना वयाच्वंगु जुसा नं आ: धा:सा नेपाल खड्गी सेवा समिति धरानया कचा: खड्गी युवा जमातया ग्वसालय् व नेवा: देय् दवु जिल्ला समिति सुनसरीया सहकार्य याना पिकाया वयाच्वंगु दु । थुगु प्याखँ स्वयेत सुनसरी जिल्ला लगाया ज:लाख:ला थीथी जिल्लाया मनुत नं धरान वईगु यानाच्वंगु दु ।

### तुल्सीपुरय् साया:

नेपा:या मध्यपश्चिम लागाया दाङ जिल्लाय् तुल्सिपुर नेवा: समाजया पूलाम्ह नाय: राजकुमार श्रेष्ठया लुमन्ति साया पिकागु दु । सापारुया लसताय् तल्सिपुर नेवा: समाजं गुंपुन्हि व सापारु

खुन्हु याना निन्हुयक साया: पिकागु ख: । पूलाम्ह नाय: श्रेष्ठयात वंगु जेठ २६ गते अपहरण याना सल्यानया छत्रेश्वरी गाउँपालीकाया जङगलय् निर्ममता पूर्वक स्याना बांछ्वाया: त:गु ख: । श्रेष्ठया हत्याय् दुथ्यापिं प्यम्हेसित धा:सा ज्वने धुंकुगु दु । वय्क:या लुमन्ति तुल्सिपुर नेवा: समाजं थ:गु हे पह: कथं वय्क:या किपा: तयातगु साया: तुल्सिपुर बजा: चाहिकुगु ख: ।

### किपुलिइ मेय्या छ्यं व त्वा:ना

सापारुया भ्त्वलय् किपुलिइ मेय्या छ्यं व त्वाना विइगु चलन दु । दैय् दसं थें थुगुसी नं सापारु खुन्हु मंगलवा: ख्याल: व:पिन्त मेय्या छ्यं व त्वाना विइगु ज्या जूगु दु । किपूया देय् पुखुलिइ थीथी बाजं थाना नापं म्ये हाला अथे हे बाजं थाना त्वा: त्वालं ख्याल: वइगु चलन दु । अथे ख्याल: वइगु भ्त्वलय् किपूया जिफा:ग: लाखे व क्व:तभा:या लाखेयात मेय्या छ्यं विइगु चलन दु । अथे हे किपूया त्वा: त्वा:यात मेय्या त्वाना विइगु याना वयाच्वंगु दु । थ्व छगू किपूया विस्कं कथंया जात्रा जुयाच्वंगु दु । लिपांगु इलय् वया यक्व त्वालं अथे मेय्या त्वाना कायेत ख्याल: वयेगु भ्त्वलय् नं लाखे हे हुइका हयेगु यानाह:गु दु ।

### प्रज्ञापारमिता ब्वज्या

यैया भगवान बहालय् सुवर्ण पुस्तक ब्वज्या बुधवा: क्वचा:गु दु । वंगु श्रावण १६ गते निसें २५ गते तक भिन्हुयंकं जूगु उगु सुवर्ण पुस्तक प्रज्ञापारमिता सफू ब्वज्या जूगु ख: । उगु प्रज्ञापारमिताय् छगू लख श्लोक दुगु लुं व व: नं च्वयात:गु सफू ख: । उगु ज्याभवलय् न्हिया न्हिथं बज्राचार्य गुरुजुपिन्सं पाठ यानादीगु ख: । वहिद्य: ब्वयेगु पर्वया कथं प्रज्ञापारमिता सफू तकं ब्वयेगु ज्या या:गु ख: । अथेहे बुधवा: बसन्तपुर कुमारी छेंपाखें कुमारी द्य:यात खटय् तया थीथी बाजं थानां भगवान बहालय् हया सुवर्ण सफू अर्थात प्रज्ञापारमिता सफू अवलोकन याका थुगु ज्याभ्त्व: क्वचायेकुगु ख: ।

### धरान रोपाई जात्रा

गुलांया भ्त्वलय् नेवा:तय्सं बुँ ज्या:लिसे स्वापु दुगु थीथी नख:चख हनांवयाच्वंगु दु थ्वहे भ्त्वलय् स्वनिग पिनेया सुनसरी जिल्लाया धरानय् च्वपि नेवा:तय्सं रोपाई जात्रा हंगु दु ।रोपाई जात्राया भ्त्वलय् ख्याल: पिहां वयगु , वा:पिईगु थ्यं लैं दुछि नाटक याना वनिगु लगायत सामाजिक , राजनितिक कुरितिया उजागर यासैं ध्याचु नकेगु याई ।

थुगु कथंया रोपाई जात्रा सलंस दै न्हय:निसें न्हयाना वयाच्वंगु जुसां थौ कन्हय् धासा नेपाल खड्गी सेवा समिति धरान शाखाया संयोजन व नेवा:देय् दवु जिल्ला समिति सुनसरिया सहकार्य न्हयाना वया च्वंगु ख: । थुगु जात्रा स्वयेत धरानय् थीथी लागा व जलखल जिल्लां तकं स्व:वयेगु याना च्वंगु दु ।थुगु रोपाई जात्रा धरानया खड्गी सेवा समितिया भवन मणिसुन्दर मार्गं माछाभौडी ,पूरानो बजार ,चिनिया चोक ,चतरा लाईन, भानु चोक लगायत थीथी थासय् चा:हिका हाकनं समितिया भवनय् वया क्वचा:गु ख: ।

### महाकाल प्याखं

करिव २०० दै न्ह्य: निसें मध्यपुर थिमिया नगदेशय् न्ह्याना वयाच्वंगु महाकाली प्याखँयात निरन्तरता वियाच्वंगु दु । सापारुया कन्हय् खुन्हुनिसें न्ह्या:गु थुगु जात्रा शनिवा: यान्हय् जक क्व:चाइ । बहनिया ७ बजे निसे ४ घण्टा लगातार न्ह्याइगु जुगु जात्रा प्यन्हु तक जुईगु ख: । तान्त्रिक विधि कथं न्ह्याइगु थुगु प्याखँ नीछ्गु तालय् प्याखं ल्हइगु ख: ।

थुगु प्याखनय् महाकाली छम्ह, महालक्ष्मी छम्ह, कौमरी छम्ह, बेता प्यम्ह, भूत भैरव निम्ह, कवं निम्ह, ख्या: निम्ह, माक: निम्ह, म्ह्यखा छम्ह, व मैसासुर दैत्य छम्ह याना जम्मा भीच्याम्ह देवगणपिनिगु सहभागी दइ । आर्थिक अभावया कारणं २०६६ सालं बन्द जुगु थुगु जात्रा तना वनेत्यंगु जुसांनं स्थानीय ल्याय्म्हतयगु कुतलं हाकनं वंगुदै निसें न्ह्या:गु ख: ।

## न्हिच्छि चच्छि

## २४ सै घण्टा प्रशारण

## जुयाच्वंगु

## नेवा: एफ. एम. १०६.६

## न्यनादिसँ/न्यंकादिसँ

# सटर भाडामा चाहियो

## DARSHAN MOBI CARE BRANDED MOBILE SHOWROOM

विस्तार गर्न निम्न स्थानहरू :

पाँगा दोबाटो चोक

नगाँउ दोबाटो चोक

लोकतान्त्रिक चोक

भत्केपाटी चोक

पाँगा चोक

मच्छेगाँउ चोक

मा ५०० (sq. ft.) भन्दा माथिका सटरहरू भाडामा चाहिएको हुँदा  
इच्छुक घर धनीहरूले १५ दिन भित्र सम्पर्क राख्नहोला ।

**DARSHAN MOBI CARE PVT. L.T.D.**

Kirtipur-9, Kathmandu Contact : 9851139408



## साहित्य उपन्यास जन्ति न्ह्यात

**चमि- मदन गोपाल प्रधान  
“क्वा:धासा”**

कथहं .....

टिप्पणी का कां मनमायां धाल,  
“मज्यूगु ला मखु । तर जिमि थन छु खँ  
जुल धा:सा न्हापां जात: तू मतू नि क्येनेगु  
अले तुत धा:सा म्ह स्वयेगु ।”

“जात: लिपा क्येनावं याना दिसँ ।  
म्ह स्वया: तलं छु जुइ । मज्यूला,  
मनतता?”

“मज्यू हे धयागु ला मदु । खँ छु  
धा:सा नि, म्ह स्वये धुंका: जात: मतुत  
धा:सा निखल:सित नं म्हाइपुसे च्वनि ।  
अथे म्हाइपुसे च्वनिगु ज्या छाया याये  
धका: जक ख: । नत्रसा म्ह स्वयां छु  
स्यनिगु ला ख: हे मखु ।”

मनमायाया विचा: खतं म्ह स्वयेगु  
लिपा हे याये मालिगु जुल ।

“ज्यू का, मनतता । थ्वहे खँ जिं  
अन वयक:पिन्त नं धाये ।” धा धां मयजु  
दन ।

“पलख दिसँ । च्या छक: भपिया  
मझूसे, गन ?” मयजुया ल्हा ज्वना:  
मनमायां पयतुकेत सन ।

“मखु मनतता, थौं भचा हथाय् ।  
लिपा त्वं हे त्वने नि । नये त्वनेगु गन  
वनि धका: ?”

निम्हं कोथां पिहाँ वन । पिने तक  
मयजुयात तया: मू लुखाया खापा तिना:

मनमाया तले थहाँ वन । टिप्पणी फुङ्ग  
त:लय् स्वचाकल । कोथाय् वँ पुल । बँ  
बिं पुइ धुंका: म्वल्हुइगु साभो छग: व  
वस:हिइगु साभो छग: काल । हाकुका:  
त्व:ता त:गु श्रीयागु कमिज छपा: व  
गंजि छपा: अले वस:हिइगु वाता छग:  
ज्वना कुने केबय् वन । हिइ मा:गु  
वस:त दुगु वाता हिति क्वसं दिकल ।

“ग्वाहालि वये मा: ला कि छु मनतता  
?” चिनिमायाया स: क:सिं थ्वल ।

क:सि पखालय् निपा च्यूल्यां दिका:  
ल्हा: फव: निफलं न्यता: फया: वास्यां  
न्हिला च्वंम्ह चिनिमायायात स्वया:  
मनमायां धाल, “छं ग्वाहालि याइ बलय्,  
सिलला चिनि.....।”

“धया: दिसँ, मनतता:जु ।”

“पशुपतिइ च्वंम्ह लुँया दोहं उसि  
सनी का ।”

“न्ह्यलय् ला ?”

कला:म्ह त्यायँ त्यायँ खँ सयेका:  
च्वंगुलिं सन्तवीर नं क:सिइ खने दयेक:  
वल । निम्हतिपुनं साप हे ख्या: याये  
मा:पिं ।

“आ:ला मजिल तता:जु, गुलि दु:ख  
सिया: च्वनेगु ? ग्वाहालि याइम्ह छम्ह  
हये माल ।” सन्तवीरया स: ताये दत ।

“हये माल धयां छु यायेगु ? हया:  
ब्यूले । कका जुइस: ख:म्ह ज्यूम्ह छम्ह  
थयक स्वया: बिइ मफुला ?” धका:  
चय् क:सिइ थ स्व:म्ह मनमाया हिति  
म्वलय् च्वदला दल । “का ! का ! का  
!” धका: कसिइ च्वपिं निम्हतिपु नं  
छसासलं हाल । निम्हं हुतय् जुया: केबय्

वल । हिति म्वलय् ग्वारा तुला च्वंम्ह  
मनमायायात निम्हेसिनं निखे ज: ख:  
लपाय् ज्वना: थनेत स्वत । “आया !  
आया !” धका: हा हाँ मफु मफु  
वाकुछिना मनमाया दनेत स्वत । दने  
मफु । ज:गु तुतिला चुइ तक हे नं  
मफु । ज:गु तुतिइ तसकं हे स्यात  
धका: मनमाया हाला च्वन ।

इत:मित: कना: सन्तवीर व  
चिनिमाया दुहाँ वंगु खना: पिने त्वाल्य  
च्वना च्वपिं छ बथां मचाल्याय्म्हत नं  
दुहाँ वल । मनूत बथां दुहाँ वंगु खना:  
क्याम्पसय् वनेत व:म्ह नवनिन नं दुहाँ  
वल । फुकक मनूत हां भुने थें फुनां  
च्वंगु खन ।

हसँमसँ धायेका: मनमाया भुयूच:ति  
वयेका च्वन । वाक्कु छिना: न्ह्याक्व हे  
सह यायेत संसां सह याये मफया: स्या:  
ख्या: लुया: हाला च्वन, “जित मजिल ।  
आया ! जि च्वने मफुत । जिगु ज:गु  
तुति त्व:धूयें च्वं । जित: अस्पतालय्  
यंकि । श्रीयात छक: सतेक छ्व । जि  
मजिल । आया वा वा ! ज:गु तुति संके  
हे मज्यू । तसकं हे स्यात । आया !  
आया !”

भुना च्वपिं मनूतय्त चिइका:  
मनमायां स्या: धा:थाय् छक: नवनिनं  
स्वल । मनां वया च्वंगु दु । स्या:गु  
तुतिइ क्यना: नवनिनं धाल, “थ्व तुति  
संका दिइ मते, काकि । आम्हेतुं भव:लंका  
तया: दिसँ । जिं कम्पाउण्डर भद्रमान  
दाइयात स:ता: हये ।”नवनिन वन ।  
मनमाया स्यात धका: हाला च्वन ।

“पलख सहयाना दिसँ तता:जु । भद्रमान  
स:त: वंगु दु ।” धका: सन्तवीरं  
मनमायायात भल्सा बिये थें धया  
च्वन । मेपिं मनूत, मचात छचा:खेरं  
च्वना: भद्रमानया लँ स्वया च्वन ।

भद्रमान व नवनिन वल । “स्वे  
स्वे” धका: भुनाच्वपिं मनूत चिइका:  
भद्रमानं मनमायाया खम्पाया चय् जँया  
क्वय् मना व:थाय् छक: थिया स्वल ।  
थिइवं “आया स्या ।” धका: ख्या: स्यंका:  
मनमाया हाल ।

“तप्यंक ग्वतुला दिसँ ।” तुति  
भवलंका पयतुना च्वंम्ह मनमायाया म्हय्  
निपा ल्हा:तिं लिधंसा बिया: बुलुहुँ थस:  
पायेका: “सनादिइ मते ।” धका: धया:  
भद्रमान दना:भुना च्वपिन्त स्वया: धाल,  
“छिपिं छम्ह निम्ह वना: आय्म्बुलेन्स  
स:ता वा ।”

“आय्म्बुलेन्स पिया च्वना: खैला ?  
ट्याक्सि जूसा धायेवं दै ।” सन्तवीरं  
धाल ।

“ट्याक्सिइ थस: पायेका यंके ज्या  
छिनिमखु । हानं स्ट्रेचर नं मदु ।”  
भद्रमानं धाल ।

मन्तदाइया मिनिबस दुनि । वयात  
छक: धाये माल ।” चिनिमायां धाल ।

“अय् ! धाथें, वया बस पिने दुला  
छक: स्व: । मचातय् बथाय् स्वया:  
भद्रमानं धाल ।

“दु ।” मचा छम्हेसिनं धाल ।

“कासा छ हे छक: वना  
मन्तदाइयात थन वये माल धका:  
स:ताहिँ ।” सन्तवीरं धाल ।

मचा हुते जुया वन । स्ट्रेचर कायेत  
वननिन व मेम्ह छम्ह नं पिहाँ वन ।  
भद्रमानं धा:थें मनमाया फितिकक हे  
मसंसे थस:पाया मिखा तिसिना च्वन ।  
याने छक: बक: पुलुकक कनीगु । हानं  
तिसिइगु । गबलें गबलें ख्या: ख्युंका:  
वाक्कु छिइगुलिं सिइदु कि स्या: सहयाना  
च्वंसां वयात तसकं हे थाकुया च्वन  
धैगु खँ । मे च्वका लुया: म्हुतुसिइ  
छचा:खेरं पिल । चय् च्वंगु वां क्वय्  
च्वंगु म्हुतुसिइ वांन्याइगु । गबलें छु,  
गबलें छु याना: मनमाया स्या: सह  
याना च्वन ।

अंगलय् हाना: लिज्या:गु  
भकुंग्वारा थें मन्तदाइयात स:त:  
वंम्ह मचा गथे वन अथे हेन्तुं हुते  
जुया वल । “जा नया च्वन । नये धुनेवं  
वये हँ ।” सें सें मिंक छसासलं व मचां  
धाल । स्ट्रेचर नं हल । ववलापिं प्यम्ह  
न्याम्हेसिनं मनमायायात बुलुहुँ ल्हवना:  
स्ट्रेचरय् तल । मन्तदाइ नं हथाय्  
पथाय्सं थ्यंक: वल । अनयागु अवस्था  
खना सुनानं छुँ हे धाये म्वाय्क वं खँ  
थुइकल अले “मनतता:जुयात ज्वना  
छिपिं पिने वा । जिं बस कया हये ।”  
धया: वन ।

मनमायायात तया: बस ब्वात, येरि  
खे स्वया: । कालमातिइ थ्यंका: बस  
दित । नवनिन वसं क्वहाँ व वं धाल,  
“थनं तप्यंक एमर्जेन्सिइ यंका दिसँ ।  
जि श्रीदाइयात ब्वना वये ।”  
कथहं ..

## साया: शान्तपूर्वक क्वचा:गुलिं ग्वसा: खलकं सुभाय् देछात

### आकिवंया साया:या पा: म्वानत्वा:यात

किपू । वंगु मंगलवा: गुलागा पारुखुन्हु किपुलिइ ने. सं. ११३७ या  
साया: नख: शान्तपूर्वक क्वचा:गुलिं साया: ग्वसा: खल:, तुभ्क्व: दबुचापाखें  
सकसितं सुभाय् देछा:गु दु । थुगुसिया साया: नख: हनेत ग्वहाली या:पिं  
टोलवासी, कार्य समितिया सकल दुज:, थीथी कव:या दुज:पिलिसें धें  
धें पापा व धा: वाजं स्यनादीपिं ग:छे दाफा खल:, य:ध्वाखा आ:खा

खल: व धें धें पापां हुइकेत: ग्वहाली यानादीपिं किपूया त्वा: त्वा:यापिं  
सकलसित नं ग्वसा: खल:पाखें सुभाय् देछा:गु ख: । अथे हे आकिवं  
ने. सं. ११३८ या साया: हनेत पाव्क: ल:ल्हाना कयादीपिं म्वानत्वा:  
आ:खा: खल:यात नं ग्वसा: खलकं सुभाय् देछा:गु दु । साया:या कन्हय्  
बुधवा: खुन्हु बहनी छगू ज्याभ्क्व:या दथुइ तुभ्क्व:या शंखधर स्मृति

पार्कय् च्वंगु सामुदायिक भवनय् म्वानत्वा:या आ:खा: खल:यात पाव्क:  
ल:ल्हायेगु ज्याभ्क्व: जूगु खु ग्वसा: खलं धा:गु दु ।

अथे हे साया:या वजि नक: वनेगु ख्याल: क्यनेत ता:लागुलिं ख्याल:या  
ख्याल:मिपिं, च्वमि, स्यनामिलिसें प्राविधिक ग्वहाली यानादीगुलिं वज्राचार्य  
साउण्ड व स्टेज सर्भिसयात नं ग्वसा: खल:पाखें सुभाय् देछा:गु दु ।  
थुगुसिया साया: हनेत आर्थिक ग्वहाली यानादीपिं संघ, संस्था, निकाय व  
चन्दा दातापिं लिसें साया: नख:या प्रचार प्रसार याना ग्वहाली या:पिं  
संचार माध्यमपिन्त नं सुभाय् देछा:गु दु । किपुलिइ थुगुसिया साया: नख:  
प्रहरी प्रशासनया उपस्थिति मदुसां ल्वापु ख्यापु मजुइक शान्तपूर्वक  
क्वचा:गु धका: ग्वसा: खलकं धा:गु दु ।

तपाईको टोलमा भएका घटना कीर्तिपुरको समाचार बनाउने  
हो भने तपाई एक कल फोन गर्नुस् हामी तपाईको टोलको  
समाचार कीर्तिपुरको समाचार बनाईदिनेछौं

## कीर्तिपुर सन्देश साप्ताहिक



### कीर्तिपुरको चित्रण

किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकू विज्ञापन  
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पतिइ

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com

# ट्रि मिडिया अब online news पनि Log on [www.tmednews.com](http://www.tmednews.com)

“हाम्रो खबरदारी, विकासमा साभेदारी”

कुनै पनि घटना, उत्सव वा कार्यक्रमको बारेमा हामीलाई भन्नुहोस  
हामी दिनेछौं, तपाईंको आफ्नै खबर पल पलको

**SUBSCRIBE**



गर्नुहोस हाम्रो YouTube CHANNEL



## Tree Media Nepal

साथै



शिल्ड, ट्रफी, मेडल, मायाको चिनो, अवार्ड  
आदि उचित मुल्यमा उपलब्ध छ।

ट्रि मिडिया प्रा. लि.

कीर्तिपुर-१०, काठमाडौं

सम्पर्क : ०१-४३३४८८०९-४३३९८८२

ई मेल : [treemedianp@gmail.com](mailto:treemedianp@gmail.com)  
[www.tmednews.com](http://www.tmednews.com)